

Gui'ch guxhaal San Pabl loj ree bén Colosas rlliladx Jesucrist

Rxhiaal Pab xtiidx Dios

1 Naj Pab, najn tijb xi apóstol Jesucrist, din zian rën Dios. Naj con Timoteo nayajcan compniar raliduladxan Jesucrist, ²caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tääman luxdoodi.

Rbejdx Pab Dios por ree xbejn Jesucrist

³Beegaj chi rarejdxan Dios, xDad Dad Jesucrist, radëedan quixtëe lojman por lëjt. ⁴Din ma baguiejnan xhienaag rlliladxidi Jesucrist xhie tää naag rëndi gra ree bén naj ree xbejnman. ⁵Guial cabëzidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. ⁶Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli rënman lëjt. ⁷Lëjt gogbee diidxli guin ree chi balüü Epafras laa reen lëjt. Laaman cayüjn dunujn

yudar abi' dád rayënan laaman, din laaman diidxli cayüjn sirv loj Jesucrist delant lojdi. ⁸Abi' tää laaman be diidx du lojn xhienaag rën lasa'di guial yu' xSprijt Dios luxdoodi. ⁹Zeel diidx chi baguiejnan xhienaag nabandi, ad racwëëzt rarejdxan Dios por lëjt din chignia'di zagdxe xhienaag rënman güüнди guneë tääman lëjt gra loj guialrajc guixhial tääman xquiarguiejndi por xSprijtaman. ¹⁰Abi' zian guibandi zi'c ryal guiban ree bén rlliladx Jesucrist, din güüнди zi'c tal ruladxaman abi' gusnuu güüнди ganax ree ni zagdxe gusnuu tää güünbeedi Dios mazri. ¹¹Abi' ranaaban lojman din con xguialrniabee za'cdxoonman gagnëman lëjt din sudxi'chidi, taan täädi xhietëëz loj guialzi tädidi sin guial yaleny'a'di. ¹²Abi' xt nix chu' luxdoodi gudëedi quixtëe loj dux Dad ree Dios guial basiaman lëjt din yayalidi ni ryal ree xbejnman, bén zinal ree xnejzaman. ¹³Laaman babëë dunuj ree loj xguialrniabee xinxab abi' bagu'man dunuj ree loj xguialrniabee xi'nman Jesucrist bén rënman, ¹⁴abi' gudijxaman por dux tol ree, yan ma raya'p ree perdon loj Dios.

**Por xguialgüjt Jesucrist ma
nadxu'né' ree Dios zagdxe**

¹⁵Achut zajc guguaa Dios, per Jesucrist naj zi'c gajczi naj Dios. Abi' laaman mal rniabeeńeman Dios diizd chi gad guidxliuj gacchaaw. ¹⁶Por Jesucrist gojc gra ni yu' xanyabaa né loj guidxliuj, zi'c ni ruguaa bejn zi'c ni ad ruguiaataman. Abi' por laaman yu' graloj guialrniabee né graloj guialguxtis ni rajp ree ni ad rajet ruguaa ree bejn. Gran gojc por laaman né par laaman. ¹⁷Mal yu' Jesucrist diizd guia'xchej chi gad guidxliuj gacchaaw, laaman dxiibguijc gra abi' rniabeeman gra. ¹⁸Abi' laa t́eeman rniabee gra ree b́en rlliladx laaman, b́en ma naj ree xbejnman. Laaman naj b́en yalój abi' yalój laaman baban loj ree bengüt din guiguien guial tijbzi laaman rajp guialrniabee loj gra. ¹⁹Din bayuladx Dios gac Jesucrist zi'c gajczi naj Dios. ²⁰Abi' por Jesucrist gra bénguidxliuj ma za' zagdxe con Dios, zi'c ni yu' loj guidxliuj zi'c ni yu' xanyabaa. Za' bejn zagdxe con Dios por xguialgüjt Jesucrist loj crüjz. ²¹Gocli ad gojctidi tijbzi con Dios, gojquidi zi'c b́en bidxe'ch laaman guial beendi ganax ni mal. ²²Per yan ma za'di zagdxe con Dios por ree guialzi ni gudéd Jesucrist chi gütaman loj crüjz din gac guidxindi lojman naya sin dol chit́eé xhie naman lojdi. ²³Per par zian rayal sudxi'chidi loj guialrlliladx ni rajpidi, ad gucwééz chinalidi xtiidxza'c Jesucrist ni ma biguejndi. Abi' diidxza'c guin gajc ree ma bire'ch guidib guidxliuj.

Abi' naj naj tijb ree b́en catie'ch diidxza'c guin ree.

**Bacaabee Dios Pab din güünman
sirv loj ree xbejn Dios**

²⁴Abi' yan nix yu' luxdon por guialzi ni cadéedan guial rünan léjt yudar abi' lasa'gajc guialzi ni gudéd Jesucrist cadéedan din chile' güünan yudar b́en rlliladx ree laaman b́en ma naj ree xbejnman. ²⁵Din Dios bacaabee naj par güünan sirv loj ree xbejnman. Abi' laaman baneé dxiin guin naj din gulün léjt xtiidxaman zi'c tal najn. ²⁶Diizd tiamp gulal ad bignia't ree bejn zagdxe ni ŕen guiéb xtiidx Dios. Per yan ma balüüman ni ŕen guiéban loj ree xbejnman. ²⁷Din gugojn reeman b́en ad najt ree b́en Israel xhienaag naj xguialnaza'c za'cdxoonman. Abi' ni ad balüüt Dios loj ree bejn tiamp gulal naj guial nabanné Jesucrist léjt abi' por laaman ragbeedi zagdxe guial yu' dxej yayalidi xanyabaa. ²⁸Abi' dunujn batie'ch xtiidx Jesucrist, baneeńen bejn ree, balüü t́een laa reeman con gra quiarguejn ni runee Dios din chi guidxin reeman lojman por Jesucrist ma naj reeman zi'c ŕenman gac reeman. ²⁹Abi' naj dád cayünan naguiejn cayünan dxiin guie con guialrniabee ni baneeman naj.

2 Ŕenan gagbeedi guial cayün da'tan naguiejn cayünan léjt yudar, né ree b́en zojb guidedx Laodicea né gra ree b́en ad wayünbeet naj. ²Cayünan naguiejn din yayu luxdoo reeman din gusnuu guiban reeman tijbzi, guién lasa' reeman chu' t́eé xquiarguejn

reeman din chile' gũinbee reeman ni ad balũũt Dios bejn ree gual abi' laaman naj Jesucrist, ³por laaman zẽed gra gualrajc nẽ gualrignia'. ⁴Canin diidx guie ree lojdi chitẽe chu gusquiee lẽjt con ree xtiidx zagdx reeman. ⁵Majsi ad za'tan con lẽjt, per yu'guican lẽjt abi' rabaan gual cayũjndi zi'c rayal, za'dxi'ch tẽedi loj gualrliladxidi Jesucrist.

⁶Zeel zi'c ma rliladxidi Dad Jesucrist, ziangajc gol gojc tijbzi con laaman. ⁷Gol been naguiejn gol binalaman guidiblagaa, gol guzudxi'ch loj gual rliladxidi laaman zi'c ma basiididi ad gucwẽez tẽe gudẽedi quixtẽe loj Dios.

Guialnaban ni rudẽed Jesucrist

⁸Gol gojpcudad, ad tiẽbidi gũin ree b́en rẽn gusquiee lẽjt gan con ree ni rulũũ reeman o con ree diidx ni ad rũjnt sirv ni zẽed por ree costumbr o por ree guialrniabee yu' loj guidxliuj, din ad zẽedt reen por Jesucrist.

⁹Din zi'cgajczi naj Dios, ziangajczi naj Jesucrist. ¹⁰Abi' nabannẽdi Dios guidiblagaa gual najdi tijbzi con Jesucrist, din laaman rniabee loj gra guialrniabee nẽ loj gualguxtis. ¹¹Abi' tẽe gual ma najdi tijbzi con Jesucrist ma yu'di xsenman, per ad lasa't sen ru ree b́en Israel, sen yu'di por laaman najn gual ma basa'ndi dol tiblax. ¹²Chi gurobnijsi, laan rẽn guiẽb gual gũjtidi con Jesucrist abi' babandi con laaman stijb gual rliladxidi Dios rajp guialrniabee persi basbanman Jesucrist loj gualgũjt.

¹³Gocli gojquidi zi'c bengũt delant loj Dios por xtolidi nẽ por gual ad guyutidi sen ni ru ree b́en Israel. Per yan por Jesucrist, ma been Dios dux tol ree perdon abi' ma raya'p ree guialnaban con Jesucrist. ¹⁴Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi gũt Jesucrist loj crũjz abi' laaman naj b́en gudijx laan por dunuj ree.

¹⁵Abi' zian beenman gan gra loj ree gualguxtis nẽ loj gra guialrniabee zẽed loj xindxab. Basa'nxtuman laa reeman loj ree bejn, beenman laa reeman gan gual gũjtaman loj crũjz.

Gol been xgab ni yu' ree xanyabaa

¹⁶Zeel achut rayal gula'ch lẽjt por ni rawidi nẽ ni rẽ'di o por gual ad rũjntidi cwent dxej lanij o dxej ni yu' bẽw cũb o dxej raziiladx ree bejn. ¹⁷Din gra ree ni guin naj zi'c tijb xbala Jesucrist abi' yan laaman naj b́en ma bi't. ¹⁸Ad tiẽbidi gutiaalguiiw b́en rẽn ree anjl zi'c Dios lẽjt, par gusa'ndi xnejz Dios, din laa reeman rulũũ naj reeman b́en naxanlax, per ad najt reeman laan rẽb tẽe reeman gual yu' ni rulũũloj loj reeman. Dxel laagajc reeman rlies xvalor por xixgab gajc reeman. ¹⁹Per laa reeman ad nabannõt reeman Jesucrist, b́en rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xixgab Dios.

²⁰Yan bal walidi ma gũjtidi con Jesucrist par ree ni rbẽẽguijc ree bẽnguidxliuj, ẽchexquiza zeel

ruzoobidi xtiidx ree b́en rēb: ²¹“Ad rayalt gugaalil ni guin, ad gawil ni guin, ad guiniaazil ni guin”? ²²Gra ree mandamient guin yu' dxej nit reen, din b́enguidxliuj gulēēguijc laa reen. ²³Diidxiczi ruliū lasajc da't ree mandamient guin guial tant rijn ree bejn naguiejn gūin reeman laa reen cumplid abi' rijn reeman b́en naxanladx dxel rusagzi laagajc reeman, per achetzi lasajc ree mandamient guin par gucwēz reen ni mal rzēēbladx reeman gūin reeman.

3 Zeel bal ma rajpidi guialnaban cūb con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. ²Ad gūindi xgab ganax ree ni yu' loj guidxliuj, gol been xgab mazri ni yu' ree xanyabaa. ³Gol gunaladx ma gūjtidi par ree ni yu' loj guidxliuj abi' ma rajpidi guialnaban delant loj Dios por Jesucrist. ⁴Abi' chi gui't Jesucrist stijb, b́en runee dunuj ree guialnaban, nē lējt yayal guibannē laaman loj xguialrniabee za'cdxoonman.

**Zi'c ryal guiban ree b́en
rliladx Jesucrist**

⁵Yan, gol basa'n gra ree ni mal riga' loj guidxliuj guie. Ad sunēdi b́en ren b́en ad najt lacheelidi. Gol basa'n ni ad rijnnt ree sirv, nē ree xgabmal nē ree ni mal yu'di gan gūindi. Ad sēēbladx tēēdi gapidi gra loj ni yu' loj guidxliuj din b́en rijn zian laan rēnman mazri luar Dios. ⁶Abi' por ree ni guin zēēd xcasti Dios par ree b́en ad ruzoobt xtiidxaman. ⁷Lasa' ree ni mal guin

beendi chi gadidi gūinbee Jesucrist. ⁸Per yan gol basa'n gra ree ni mal guin zi'c guialrdxe'ch, guialralen lasa', guialrijn ni mal lasa', guialrnieeguijdx nē guial rniee diidxguijdx. ⁹Ad rusquiee loj lasa'di, din ad nabantridi zi'c gubandi gocli chi beendi ni mal ree, ¹⁰din yan ma bidxaa mod nabandi. Ma najdi zi'c bencūb guial chigagaj ma cayajquidi zi'c rēn Dios gaquidi din gūinbeedi Dios mazri zagdxe, b́en runee lējt guialnaban. ¹¹Abi' chi ma rliladx bejn Jesucrist, achet gūinan chutēz najman, bal najman b́en grieg o b́en Israel, bal yu'man sen ru ree b́en Israel o ad yu'taman laan ya, bal najman benzit o najman b́en zobj dajn, bal najman zi'c b́en nado' o ad najtaman zi'c b́en nado' Per ni mazri lasajc naj guialrliladxaman Jesucrist, b́en rniabee za' tēēman con dugra ree.

¹²Abi' Dios rēn lējt, zeel gulejman lējt din gaquidi xbejnman. Zeel gol baya bejn ree, gol gojc benza'c, gol gojc b́en naxanladx, ad gaquidi bendxal, gol gojp pasens lasa'di. ¹³Ad yaleny'a'nē lasa'di. Gol been tēē perdon lasa'di bal xhie rijnnē reeman lējt. Zi'c been Dad Jesucrist lējt perdon ziangajc gol been perdon bejn ree. ¹⁴Gol badxe'guijc guialrēn lasa' naj ni mazri lasajc. Abi' guialrēn lasa' guin rijn yudar din guidxaag guiban bejn. ¹⁵Gol cwējb nabee Jesucrist lējt din yabedxe luxdoodi, din par zian gulej Dios lējt par gaquidi tijbzi por Jesucrist gol badēē tēē quixtēē lojman por zian.

¹⁶Gol badxe'guijc da't xtiidx Jesucrist, gol balūū gol guneenē

tēē lasa'di zi'c rayal. Gol badēē quixtēē loj Dios con ree cant nē ree salmos nē los demazri ree cant ni naj par Dios. ¹⁷Xhietēēz ni güüindi ni guinee tēēdi, yaloj xgaj gol basaaladx Dad Jesús abi' por laaman gol badēēd quixtēē loj dux Dad ree Dios.

Zi'c rayal guiban tijb famil

¹⁸Lējt b́engunaa yu' ree lacheel, gol bazoob xtiidx lacheelidi, din zian rayal güün b́en rliadx Jesucrist. ¹⁹Abi' ziangajc lējt xinguaaw yu' ree lacheel, gol guyèn lacheelidi ad gusagzi tēēdi laa reeman.

²⁰Nē lējt xin naj ree xi'n, gol bazoob gra xtiidx ree xDadidi, din zian ruladx Dios. ²¹Abi' ziangajc lējt dad na, ad gusagdiaj xi'ndi chitēē guidxe'ch reex abi' yalenyá' reex.

²²Lējt b́en rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguiaatzi reeman lējt par yaya'ndi zagdxe loj reeman, guidib luxdoodi gol been xchiin reeman por respejt ni rajpidi Dad Jesucrist. ²³Xhietēēz nin güüindi, gol beenan con gan. Gol gunaladx loj Jesucrist cayüjndi sirv, ad lojt b́enguidxliuj. ²⁴Din lējt ma ragbee guial zian yu' ni tia'di loj Dad Jesucrist guial cayüjndi laaman sirv. ²⁵Per par ree b́en rüjn ni mal, laa reeman yayal casti por ni mal been reeman, din Dios ad rbetaman loj bejn.

4 Négajc lējt b́en naj ree patron, gol been zi'c rayal con ree b́en rüjn xchiindi, gol gojc tēē benza'c con laa reeman, din lējt ragbee guial xanyabaa yu' b́en rniabee lējt.

²Gol guzusin, gol gurejdx Dios ad bal gucheeladxidi, gol badēē quixtēē lojman. ³Gol gurejdx tēē Dios por dunujn din guixhialaman nejz din gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguuib. ⁴Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdxe.

⁵Gol gubajn zagdxe delante loj ree b́en ad waliladxt Jesucrist gol gunee tēē xtiidxaman loj reeman beegaj chi chu' mod. ⁶Chi rüdi diidx, gol be diidx xnejz din yayuladx bejn ni rnieedi gagbee tēēdi xhienaag yadxi'di ni rniabdiidx reeman lojdi.

Rxhiaal ree xbejn Jesucrist xtiidx Dios

⁷Tíquico, tijb du lasa' ree, b́en rayèn ree, b́en diidxli cayüjn naj yudar cayünan sirv loj Jesucrist, laaman gugojn lējt gra xhienaag za'n niz guie. ⁸Par zian caxhalan laaman din gugojnman lējt xhienaag nadxu'n niz guie din yagu' tēēman luxdoodi. ⁹Abi' con laagajcaman caxhalan Onésimo, tijb du lasa' ree b́en rayèn gajc ree, b́en naban zi'c rayal, b́en naj b́en ladxidi. Laa reeman gugojn lējt gra ni cayajc niz guie.

¹⁰Aristarco, b́en yu'nē'n ladxguuib, laaman rxhiaal xtiidx Dios lojdi. Négajc Marcw, bijchwin Bernabé rugajpdioz lējt. Abi' ma bagojnman lējt chunin naj Marcw, bal gui'taman guidganajman lējt, gol baca'man zagdxe. ¹¹Abi' négajc Jesús, b́en la gajc Justo, rxhiaal

xtiidx Dios lojdi. Loj gra ree bèn Israel riladx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bèn cagu' luxdon. ¹²Në Epafras, bèn ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejczy rbejdxaman Dios por lëjt din sudxi'chidi chinalidi xnejz Dios güün tēedi gra zi'c rēnman. ¹³Naj ragbee zagdxe guial dád ruman xgab por lëjt, në por ree bèn Laodicea, në por ree bèn Hierápolis. ¹⁴Lujc, doctor rayèn da't ree, në Demas, në reeman rxhiaal xtiidx Dios lojdi.

¹⁵Gol bagajpdioz ree dux compniar ree bèn riladx ree

Jesucrist, bèn zojb ree luguiedx Laodicea. Gol bagajpdioz tēē Ninfas con los demazri ree xbejn Jesucrist bèn rado'p ree lidxaman. ¹⁶Chi ma gulox biilidi gui'ch guie, dxel gol guxhaalan loj ree bèn riladx Jesucrist, bèn zojb ree luguiedx Laodicea, din në reeman gool laan. Në gui'ch ni guxhalan loj reeman rayal yaxhaal reeman lojdi din nēgajc lëjt gool laan. ¹⁷Abi' gol güjdx loj Arquipo din güünman cumplid ni ma bacaabee Dad Jesucrist güünman. ¹⁸Naj Pab, quijb naj cuca lejtr guie ree par gugajpdiozan lëjt. Gol basaaladx guial yu'n ladxguiib. Dios güünle' lejt. Amén.